

**Meeqqat atuarfiini atuartunut angerlarsimaffiit atuartunullu inissiat pitsaassusissaasa minnerpaaffilerneqarnissaat siunertaralugu Naalakkersuisut suliniuteqaqqullugit Inatsisartut aalajangiiffigisassaattut siunnersuut**

(Inatsisartunut ilaasortaq Jane Petersen, Inuit Ataqatigiit)

**Akissuteqaat**

(Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq)

**Siullermeerneqarnera**

Inatsisartunut ilaasortap Jane Petersenip meeqqat atuarfiini atuartunut angerlarsimaffiit atuartunullu inissiat pitsaassusissaasa minnerpaaffilerneqarnissaat pillugu siunnersuuteqarnera Naalakkersuisut qujassutigaa. Siunnersuutip siunnersuuteqartup tamatuma tungaatigut soqutigisaqartuunera takutippaa.

Meeqqat atuarfiini atuartut meeqqat atuarfiini atuartunut angerlarsimaffinnut atuartunullu inissianut sapinngisamik pitsaasunut nuuffissaqarnissaat Naalakkersuisut qulakkiissallugu pingaaruteqartutut isigaat.

Soorlu aalajangiiffigisassatut siunnersuumi allaqqasoq atuartut angerlarsimaffiisa initaasa aqqis-sunneqarnissaannut ilitsersuusiortoqarsimavoq. Ilitsersuut kommunineersut ilaat kiisalu Ineqarnermut, Attaveqaqatigiinnermut Angallanermullu Naalakkersuisoqarfik, Kalaallit-nunaanni Sanaartunikkut maleruagassanut akisussaasoq suleqatigalugit suliarineqarpoq. Ilitsersuut kommuninut tamanut nassiunneqarpoq, kiisalu Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfiup (KIIN) qarasaasiakkut nittartagaanut kikkunnit tamanit takuneqarsinnaanngorllugu ikkunneqarluni.

Ilitsersuut taana atuartut angerlarsimaffiisa suliarinerini minnerpaaffiliinernik kiisalu nalinginnaa-sumik pitsaassutsikkut malitassanik imaqarpoq. Tassa taakkua malillugit nutaanik sanasoqarsinnaassalluni, allanngortiterisoqarsinnaassalluni nutarterisoqarsinnaassalluni aamma/imaluunniit ul-lutsinnut naleqqussarlugu allilerisoqarsinnaassalluni.

Maannakkorpiaq inatsisitigut pituttuisunik maleruagassanik pilersitsisoqarsimanngimmat pissutaavoq meeqqat atuarfiinut peqqussummi tamanna pillugu nalunaarusiortoqarnissaa pillugu allaqqasoqanngimmat. Inatsisartut peqqussutaanni nr. 8-mi ulloq 21. maj 2002-meersumi meeqqat atuarfiinut tunngasumi § 33 imm. 1 nr. 3-mi allaqqavoq meeqqat atuarfiini atuartunut angerlarsimaffinnik atuartunullu inissianik pilersitsinissaq kommunalbestyrelsip suliassarigaa, kisiannili piginnaatitsinnermut aalajangersagaq imm. 2-mi tamanna taamaallaat imm. 1 nr. 2-mut innersuussivoq, tassanilu allaqqasoq tassa atuartut nappaammik tunillaasoqarsinnaaneq imaluunniit atugarissaarnissaq pissutigalugit piffissami sivisunerusumi atuarfimmi atuar-tinneqarsinnaannginnerannut tunngasoq. Aalajangersagaq taamaaliluni imm. 1 nr. 3 innersuus-sinngilaq.

Meeqqat atuarfiini atuartunut angerlarsimaffiit atuartunullu inissiat pillugit inatsisitigut pitut-torsimasumik maleruagassanik pilersitsinissaq siunertaralugu nalunaarummik pilersitsisoqassappat meeqqat atuarfii pillugit Inatsisartut peqqussutaat allanngortinneqaqqaartariaqassaaq.

Nalunaarutissaq taamaattoq KANUKOKA qanimut suleqatigalugu suliarineqartussaassaaq, kiisalu tunngaviussaaq malittarisassat Nunatta karsianut aningaasartuutissanik nassataqassanngitsut.

Naalackersuisut sulissutigissavaat kommunit peqatigalugit maleruagassat suliarineqarsimasut kommunit siunissami malerualerumaaraat. Kisiannili aamma Naalackersuisut siunniuppaat Inatsisartut 2011-mi upernaakkut katersuunnissaannut maleruagassanik inatsisitigut pituttuiffiusunik tunngavissanik pilersitsiniarlutik, taamaaliornikkut malinninngitsunut uparuaasinnaanissaq periarfissaqalissamat. Iltersuut siunissami maleruagassanik pisussaaffiliisunik aallaavissatut piukkunnartutut isigineqarpoq.

Taamatut oqaaseqarlutik Naalackersuisut siunnersuutip taperserpeqarnissaa inassutigaat.